



**SAUNOAGA AUTU: AFIOGA FIAME NAOMI MATA'AFU –
TA'ITA'I/PALEMIA O SAMOA; SUI MINISITA O LE SOIFUA
MALOLOINA**

**SAVALI FA'APITOA – FA'ATAUAINA O LE VAIASO O LE SOIFUA
MALOLOINA O LE MAFAUFAU
Aso Tofi, 10 Oketopa 2024
9:00am – 10:00am – Luma Maota o le Malo**

Lau Susuga i le Taitai o le Sauniga, Captain Eric Turner,

Lau Afioga i le Sui Palemia, Afioga i le Saoali'i, Tuala Tevaga Iosefo Ponifasio,

Paia o Minisita o le Kapeneta,

Sui o Malo Aafaatasi ma Faalapotopotoga mai Fafo,

Le paia ma le mamalu ua aofia potopoto,

Faafetai etc.....

O le asō, ua fa'ailogaina ai e le lalolagi atoa e aofia ai ma Samoa le Aso Fa'apitua o le Fa'atauaina o le Soifua Maloloina o le Mafaufau. Ua fa'ai'u ai fo'i ma polokalame e pei ona tapisaina ai e Samoa le Vaiaso Faapitua mo le fa'alauiloaina o le taua o le Soifua Maloloina o le Mafaufau, e pei ona sa amata mai le Aso Sa 6, Oketopa 2024.

Tatou ave lea o le vi'iga i le Atua, ua livaliva le foe a le tautai, ua a'e manuia taumafaiga o lenei vaiaso.

O le soifua maloloina o le mafaufau e aofia i le fa'atulagaga fa'asaienisi o sē tasi o gasegase tumau, ua to'atele nisi ua a'afia ma maumau ai le soifua. E tusa ai ma fa'amaumauga fa'asoifua maloloina, e sili atu ma le 80% o tagata Samoa

ua a'afia i gasegase tumau e a'afia ai totoga e pe'i o le suka, toto maualuga ma o'o ai ina maua i gasegase o le fatu, kanesa ma isi. O lo'o aofia ai i totonu ma le faitauga o tagata ua a'afia tumau le mafaufau i le faitauga o nei gasegase tumau. O fa'amaumauga lata mai, o le to'atele ua a'afia le mafaufau ma fa'amauina e mafua mai ona o le soona tagofia o le ava malosi. Ma ua mafuli i tupulaga talavou o lo'o nonofo i nu'u tu taulaga, o i latou fo'i nei e faigaluega.

O le sini autu o leni tausaga ma lona fa'amoemoe, ua ave le fa'amamafa i le soifua maloloina o le mafaufau i totonu o fale-faigaluega. O se tasi o mataupu ua le Pau, le Vau, a ua fa'atāfea i le auau e nisi tagata. Atonu e malamalama gofie pe a tatou talatala iai, ae faigata lona fa'atinoga ma e le'o lagonaina e le to'atele.

Afai o le tele o le taimi o le tagata faigaluega e alu i totonu o le fale-faigaluega, e tataua ona tapena fa'afafine to'aga le silasila mamao i le mafaufau manuia o le afaigaluega. E le masino o le a si'itia se auunaga, tele tupe maua ma fa'afiafiaina le ta'ita'i o le fale-faigaluega, o le afaigaluega faapea ma aiga o lo'o tapua'i mai.

E le o po malaē le to'atele o e pele ia tatou uma, o fanau, uso ma tuafafine faapea tuaā ua a'afia mafaufau. E le gata o i latou ua iloa āuga ma iai foliga va'aia, ae fa'apena ma nisi o lo'o a'afia i nisi o gasegase ua avea ma mafuaaga ua a'afia ai ma le mafaufau. O le popōlega tele, o le to'atele o lo'o a'afia e le'o mafai ona iloa, ma o nisi ua a'afia ma ma'imaui ai le soifua ona o le pule i le soifua. Ua taotaomia le saili o se fesoasoani ona o le to'atele o lo'o a'afia i sauaga ona o le fefe ma le tusitusilima.

E le māmā leni mataupu, ma o le tele o lu'itau pe a a'afia le mafaufau, e le gata o le a afaina ai le auunaga o se fale-faigaluega, ae faapēnā ona a'afia ai aiga, o fanau, faapea ma nu'u ma le atunu'u. O Samoa o lo'o fa'avae ana auunaga tausili i so'o se fale-faigaluega i ana tu ma aganu'u, e pei o le fa'aaloalo, alofa ma le tautua matavela. O nei tu ma aga a Samoa e mafai ona fa'alautele e fai ma vaifofō ina ia maua le mafaufau maloloina o le tagata faigaluega.

O se fa'amalosi mo fale-faigaluega uma faapea ma ta'ita'i o Samoa, e tāua tele la tatou pitolaau fai fa'atasi. Afai e lagonaina e so'o se tagata faigaluega o lo'o iai tu ma aga e pei o le alofa ma le fa'aaloalo, e ta'ita'itama ai le fa'atinoga o le galuega, o le a si'itia ma maoa'e so'o se auauunaga, o le a telē le lagolago a le afaigaluega, ma fa'atuatuaina ta'ita'i o so'o se fale-faigaluega.

O le fesili - O a nisi taumafaiga tatou te galulue ai ina si'itia le soifua maloloina o le mafaufau i totonu o se fale-faigaluega? Ia tatou:

- Lagolago ma fai le fale-faigaluega o se nofoaga e fiafia ai tagata e galulue.
- Ia saogalēmū le fale-faigaluega mo tagata uma, e aunoa ma le tusitusi lima ma le fa'ailoga tagata
- Ia amanaia le taimi e tatau ona mālōlō, ma mafuta ai le tagata faigaluega i lona aiga
- Ia fa'atino ni a'oa'oga e si'itia ai le malamalama o ta'ita'i o fale-faigaluega i le tāua o le soifua maloloina o le mafaufau.

E toe fia fa'aleo le tele o taumafaiga a Samoa ua iai, e pei ona iai le saunoaga a le Afioga i le Sui Palemia i lana saunoaga autū i le Aso Sa, na tatalaina ai lenei Vaiaso Faapitoa mo le mafaufau maloloina.

- O galuega ma auauunaga e tauala atu le Matagaluega a le Soifua Maloloina, ua amanaia ma tu'ufa'atasia ai vaega o le siakiina o so'o se gasegase, e le gata i le tino ae ua aofia ai ma le mafaufau. O lenei taumafaiga, ua tatau ona fa'ata'ita'i ma fa'atino e fale-faigaluega, e le gata o le ausia o galuega a le afaigaluega, ae ia silasila toto'a i a'afiaga o le soifua maloloina o le mafaufau.
- Ua tele polokalame fa'alauiloa, o auauunaga mo le fa'atalatalanoaina o i latou ua a'afia, faapea ma faigafa'avae ma tulafono mo le unaia o le soifua maloloina o le mafaufau.
- Ua tele polokalame ma auauunaga e taofi ma fa'atonutonu ai mafuaaga fa'avae o le a'afia ai o le mafaufau e pei o le ava malosia ma le tagofia o fualaau fa'asaina.

Ae peita'i, o lo'o mana'omia ona fa'aauau ona tapisa lenei mataupu i auala saogālēmū, alofa lē fa'atuāoia, ma aua ne'i iai se tusitusilima. E mo'omia na

lalago fa'atasi auaunaga fa'asoifua-maloloina ina ia si'itia faigafa'avae ma tulafono e aofia ai vaega o le mafaufau manuia e aunoa ma le fa'aitū-au.

O le pitolaau a aiga, āoga, fale-faigaluega, nu'u aemaise ekalesia o le ogatotonu lea o le fa'avae o le soifua maloloina e aofia ai ma le mafaufau manuia.

E toe momoli le agaga fa'afetai i a tatou auaunaga ma fale-faigaluega ua potopoto lenei aso, i lā outou lagolago i lenei fa'amoemoe. E fa'afetaia a tatou paaga uma fa'asoifua maloloina faapea ma auaunaga o lo'o fa'aauau ona galulue mo le soifua maloloina o le mafaufau.

Ou te fiafia tele e fa'alauiloa ai fo'i le fa'amae'a ai o fa'atinoga uma o le Vaiaso Faapitoa o le Soifua Maloloina o le Mafaufau i Samoa i le asō.

Agalelei le Atua i fuafuaga o lenei aso, aemaise fo'i le aga atu mo le Aso Sa faapitoa o le fanau.

SOIFUA